

Sas priorissas de Nughedu Santa Itòria

Sas priorissas funt 7:

De su Santissimu	sa mazore
De Nostra Sennora	sa segunda
De Deus	sa tertza
De sa Madonna Ausiliatritze	sa cuarta
De Santu Antoni	sa quinta
De Santa Rita	sa sesta
De sas Ànimas	sa sètima

Benint numenadas sa die de su Perdonu de Maju dae sas priorissas de s'annu in antis.

Onzi priorissa si cricat sa cumpanzia, chi est cumposta dae sa suta priorissa e duas massajas.

Sas priorissas intrant sa prima die de Sant'Andria (sa die de totu Sos Santos); est traditzione chi si atobient totu e sete cun s'issoro cumpanzia denanti a sa crèsia pro intrare paris a sa missa.

Comente saludu sa priorissa mazore dat s'abba santa a totus e onzi pessone chi dd'arretzit saludat narande Ave Maria; sa priorissa mazore arrespondet Gratzia Prena e a pustis onzi cumpanzia pigat postu in su bancu sou. Cando bessiant, a sa missa finida, su saludu de sas priorissas fuat a si basare sos coddos una cun s'àtera, cosa chi como non si faet prus.

Est traditzione (chi non ses perdita), chi sa die de totus sos Santos e pro sas àteras festas, sas priorissas cumbidant sas massajas in domo issoro.

Sas priorissas traballant totu s'annu pro sa crèsia: mundant e samunant in terra, che leant su pruine dae totue e mudant s'artare cun sos froes, mantenent e

samunant sas tiazas e sos purifichinos.

Custu traballu benit fatu onzi chida a turnu, dae sa priorissa cun sa cumpanzia sua; pro sas festas totu s'impreu ddu faghet paris.

In totu s'annu su traballu prus urpilosu est pro sa Chida Santa a comintzare dae sa Dominiga de Prama.

Sas pramas benint segadas e allorigadas dae sas priorissas e dae chi est de bona voluntade e dd'ischit fàere, mancarì non siat in s'impreu.

Sa Dominiga de Prama sas pramas benint dadas a totu sa populatzione.

Sa zòbia Santa si preparat su Sepurcu in ue si ponet su Santissimu pro duas dies; s'artare mazore benit ispozadu fintzas a su Sabudu Santu, cando benit mudadu pro sa die de Pasca Manna.

Sa chenabura Santa si preparat sa Nostra Sennora Addolorada in dolu e su Cristu mortu in sa letiga pro sa crufessone. Custa si faghet a s'iscurigadortzu in ziru in sa bidde cun cantos chi benint cantados solu pro custa occasione; totus sos presentes tenet in manos candelas allutas.

Su sabudu Santu benit aprontadu unu labiolu de abba e unu brasieri, chi su preide at a beneìghere in sa funtzione de su sero. Nostra Sennora benit bestida cun pannos de allirghia e su Cristu postu in sa portantina pro sa Domìniga.

Sa Domìniga de Pasca Manna in sa crufessone de s'Incontru, sas priorissas andant a in nantis cun sas candelas allutas; a pustis benit fata sa missa.

- Documentu iscritu grazias a s'azudu de Savina Iscanu.